

Procurar per udida

Il cussegl grond ha surdà be ina da las tschintg petiziuns dal parlament da mattas

■ **Il cussegl grond ha tractà il mardi passà las tschintg petiziuns inoltradas dal terz parlament grischun da mattas dal november passà. La plipart dals giavischs stipulads da 100 mattas grischunas ha il parlament prendì per enconuschientscha.**

Mobbing è ina tematica che fatschenta la giuventetgna grischuna, almain sch'ins resguarda las petiziuns dal parlament grischun da mattas. Las participantas al terz parlament da mattas dal november passà han pretendì en ina da lur istanzas dad integrar la tematica mobbing en l'instrucziun etica da las scolas popularas, dad incumbensar ina persuna entaifer la scola da sa fatschentar cun mobbing e dad integrar mobbing sco delict en l'ordinaziun disciplinara da las scolas. Sustegn ha la petiziun chattà da la cumissiun da furmaziun e cultura dal cussegl grond. La presidenta da quella cumissiun, la deputada *Cornelia Märchy* (pcd Domat), ha pudì sa referir al maini da la maioritad da la cumissiun e savì proponer dad acceptar la petiziun per mauns da la regenza grischuna. La plipart da deputadas e deputads è suandada la proposta da la maioritad da la cumissiun cun 92 cunter 14 vuschs. Uschia che la regenza grischuna sto sa fatschentar cun la tematica e prender posiziun en chausa. Las ulteriuras quatter petiziuns ha il cussegl grond prendì per enconuschientscha. Las mattas dal parlament grischun eran sa fatschentadas cun dumondas da l'integraziun da giuvenils esters en scola, pretendì mesiras per augmentar la cumpart da dunnas en la politica grischuna, meglierar l'egualitad da las schanzas e stgaffir plazzas d'emprendissadi en regiuns periferas. Quellas petiziuns ha il cussegl grond sulet vuli

prender per enconuschientscha senza surdar ina incarica a la regenza. Gia en la debatta d'entrada è sa mussada la tenuta exprimida tras l'entira discussiun. Resalvas vers las finamiras da la petiziun dal parlament da las mattas èn vegnidas dal deputà *Roman Hug* (pps Termin). Per el èn las pretensiuns da las petiziuns memia severas. La deputada *Sandra Locher Benquerel* (ps Cuiira) è da l'avis ch'il parlament da mattas saja impurtant per motivar las giuvnas da s'engaschar per la poli-

tica. Ella avess gì gugent ch'il cussegl grond avess surdà tuttas petiziuns per mauns da la regenza. Era per porscher a las mattas la vista da la regenza sin lur istanzas. La maioritad dal cussegl grond è dentant suandada la maioritad da la cumissiun ed ha surdà sulet ina petiziun per incarica a la regenza. Tuttina spera la presidenta da la cumissiun, *Cornelia Märchy*, ch'ina part da las giuvnas mattas grischunas chattia in di la via en la politica e la fin finala en il cussegl grond.



È sa fatschentada cun las petiziuns dal parlament da mattas: La presidenta da la cumissiun da furmaziun e cultura, deputada **Cornelia Märchy**.